




Meeze Toganne Caana Miishshata

Leveled



Wolayttatto Doona



Ha gujo nabbabo maxaafay Yuu Essi Eyidiyappe (USAID) beettida miishshaa maaduwaa Seev Ze Childdirenee (Save the Children), Luxettaa Moconaynne Tohossa Dalgga Manttiya Luxettaa Beeroy issippe hashetin giigidi attamettidaagaa.

2009 M.L.



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>




Meeze Toganne Caana Miishshata

Kifilee 4

Saaminttay 5

Leveled




Luxissiyageetussi Kaaletuwa

Naati nabbabuwa doommanaappe kase misiliyanne huuphe yohuwa bessidi nabbaboy odiyoba malana mala oychchite. Nabbabi simmidi wurssettan de'iya oyshata zaarana mala oottite.

Nabbabuwappe kasetiya Mali be'o Oyshaa

Ha huuphe yohuwanne misiliya xeelliyo wode kaalliya nabbaboy aattiyo kiitay ayba gaada oppay?



Shemppuwa 1: Togawunne Caanawu go'ettiy oobata

Toganne Caana miishshati qommuwaninne immiyo go"an keehi cora. Hemetan xeellikko sa'an haattaaninne carkkuwan hemettiyaageeta geetettoosona. Meretan shaakkidi xeelliyo wode shemppoy de'iyabatanne asi medhdhidobata geetettoosona. Tookkiyobankka battidi be'iyo wode asaa tookkiyageetanne miishshaa tookkiyageeta geetettoosona. Miishshaa tookkiyabatuppe asa mereta gidennaageeti hare, maggaaye, maxaana, baqulo gaanawu danddayettes. Asi medhdhidobatuppe asa gidennabata tookkiyabati qassi dooya kaamiya, miishshaa tookkiya markkabiya, baaburiyanne horoophphilliya.

Asi medhdhidobatun asa tookkiyabati so otomoobiliya, asaa kaamiya, otobisiya, asaa baaburiya, markkabiyanne horoophphilliya. Dola mereta toganne caana mehetuppe asaa tookkidi issi sohuwapple hara sohuwa gattiyageetikka paraa, baquluwa, gaameelanne, hariya, gididi erettoosona. Hageeti asa xallawu gidennan dumma dumma hanotan asa gidennabaakka sohuwapple sohuwa gaattanawu go"oosona.

Gaasoykka issi toga miishshaa muleera issibaa xallaassi kuuyettees gaanawu danddayettenna. Ha sa'aa duussan issibaassi giidi milxxixxi oottidi shaakkidi wottiyobay darennna. Asaassa giidoogee miishshaaway xayikko miishshaassa gidanawu danddayees. Hegaadankka miishshaassa giidoogee asaagee xayikko asaa tookkennaadan diggiyabi baawa. De'uwa kumettay de'idi hagee hagaassa giisseesippe attin pacay de'ikko aybaanne shaakissenna.

Leemisuawu dooya kaamiya ekkidi xeelliyo wode otobisee matan de'ikko dooyay miishshaa tookkin otobisee asaa tookkees. Otobiseekka dooyay xayikko asaara miishshaara gattidi tookkanawu danddayees. Miishshaa markkabeenue asaa markkabee issi sohuwan de'ikko asaagan asay gelin miishshaagan miishshay caanettees. Gidoppe attin issuwa xallay de'iyaba gidikko asaanne miishshaa tookkidi qaaxxiyogee attenna. Horoophphille gidin baabureekka hagaa mala oosuwa oottanawu danddayiyogee keehippe geeshsha.

Hegaa mala tumatettay dure gididee manqqa gidida awu biittankka oottiyaba gidiyogaa daro ertanchchati wotti kanttiyoba. Hegaassa issi sohuwan moodettida miishshay merinawu he imettida ooso xallaa oottiiddi utti aggenna giyogee. Wodiyappe wodiyian woykko hanotaappe hanotan dumma dumma haggaazaa immees giidi kuuyennaadan diggiyabi baawa. Qanttaara issibay sohuwappe sohuwa qaaxxiyo miishshatikka hanotaynne wodee kiittiyobaa oottoosnappe attin asay immobaa xallaa oottokkona.



Shemppuwa 2: Paatettaa Yohuwa

Qommoonni koyro shemppuwani denttidobata ekkidi etabaa kyan kyan denttidi be'ana. Meeze toganne caana miishshatu moodettaakko gelishin denddiyabati de'oosona. ‘Meeze’ giyogee zammaanaappe dumma gididi saynise peenoy gakkennan asay bari heeran de'iya metuwassi qoppi ekkidi medhdhidiyoba.

Deexuwa tookkanawu, phashaa aatti yegganawunne eesuwa gujanawu go'etti yobati meeze macara geetettoosona.

Leemisuwassi asay biittay dereqqin, qoddin phalqgettennaagaa woykko kushiyana booddin aadhdhennaagaa eridi meeze eran aylliya xikkiya medhdhiis. Hegaappe kaallidi issi amarida wodiyana daro shooqaa goyyanawu kaduwa qambaraa medhdhidi go'ettiyogawu pinniis. Toganne caana miishshata xeelliyanankka hegaara milatiya hanotay borxxu giidi xeelliya tuma. Zammaana geetettiyaagee ubba macarankka xeelliyo wode meeziyappe dummatiyaba gididi saynise ogiyan issi qofettidabaa poliyo miishshaa go'ttiyogaa.

Hegeekka asay oottiyo, hemettiyonne xaafiyoo goochchiyonne tookkiyo wode eesuwa, abbiyanne yesuwa gujjidi oosuwa qantta wodiyana poliyo ogiya medhdhanaassa. Leemisuwassi tirakiteriya woykko goshshaa kaamiya ekkikko booray saamintta muumiya goyyidi wurssenna shooqaa laaxa saatee gakkennan milxxi oottidi goyyees. Asay sugidi goochchidi qaattennabaa doozeree biradhdhiya xeeran oyqqiyabandan denttidi cuguddi yeddees.

Baquluwan paran heezzu oyddu gallassaa hemettiyo haaho ogiya kaamee issi saatiya giddon juujidi gakki wodhdhees. Asay xaafidi darissanawu agina muumiya ekkiya xuufiya maashinee heezzu oyddu daqiiqaa giddon puti aggees. Hagee ubbay meeze ogiyan wodiya ekiyabaa, abbiya koyyiyabaanne eraa koshshiyaba ubbaa qantta ogiyan polanawu maaddees. Simi ane qaalatu birshshettaynne dummatettay hegaa keena qonccikko gidiyaba milatees.

Hegaa gishshawu nuuni ekkidi denddido meeze toganne caana miishshatukko aadhdhiyogee keehippe koshshiyaba. Meeze toganne caana miishshatikka wontta qommon giidoogaadan saynise ogiya peenoy gakkibeenna miishsha gididi asay bari heeraa metuwa pagalanawu qoppidi ooswan peeshshiyobata. Meeze toganne caana miishshatikka bantta giddon shemppoora de'iyabatanne shemppoy baynnabatuura walahan oottiyabata gidanawu danddayoosona.



Shemppuwa 3: Walahan Oottiyabata

Walahay caaniyobaa mittaappenne birataappe oottin meheti woykko asay goochchiininne sugin biyaba giyogaa. Leemisuwassi kushiya gaaree tookkidobaa barkka bana laaggidi ekki beenna.

Gaaree bari tookkidobaara qaaxxanawu asay sugarawu koshshees. Gaaree koyrokka ba mereta hanotan asay suganaadan giigidi merettees.

Sunttaykka hegaappe denddidaagan kushe gaariya geetettees. Walahan oottiya caana miishsha geetettidoykka gaaree zokkuwan darobaa tookkidi qaaxxiyaba gidikkonne goomaanne asaa wolqqaa go'ettidi qaattiyo gishshawu walahan oottiyabaa geetettees.

Hare gaareenne para gaareekka walahan
oottiya meeze toganne caana miishshatu giddon
moodettiyabatu leemiso gaanawu danddayettees.
Hare gaaree asay kushiyan sugiyo gaariyappe
keehippe al"onne caaniyobaakka issi kutti darobaa
woycko corabaa tookki ekkidi qaaxxaiyaba. Hare
gaaree al"o geetettiyo gaasoykka I oosettiyyoy
corabatuppenne mataappe happy oottidi ekkidi
medhdhiyoba gidennaaga. Gaaree kaamiya goomaa,
aaho gonggiya, mittaa, wodoruwanne hariya go'ettin
merettees.


Hare gaaree bari aaho gonggiyan cora woycko
daro miishshaa tookkidi issi sohuwappe qaaxxiyoy
haree goochchiina. Gaariya ha qommon qonccida
ubbay issippe hashetidi qaattoosona. Goomay
haree baynnan gonggiyan de'iyabaa ekkidi barkka
qaaxxenna. Hareekka goommayne gonggee baynnan
shiiqidabaa ubbaa sa'aara goochchi ekkidi baanawu
keehippe deexxiyaba. Hegee baynnaba gidiyakko
walahan oottiyaba geetettanawu danddayettenna.

Para gaariya hanotaykka hare gaariyagaappe dummatiyobi hegaa keeni darennna. Para gaaree oosettiyoykka naa"u kaamiya goomaappe, mittaappenne dumma dumma wodoruwappenne dafuwappe gidiyogee hare gaariyara milatissees. Para gaariya hare gaariyappe dummayiyabi para gaaree asaa caanidi issi sohuwappe qaaxxiyaba gidiyogaa. Para gaaree shenee imettido ogiyana gidikko heezzaappe biidi ichhashu asaa gakkanaashin goochchi ekkidi koyyido sohuwa gattiyo oosuwa polees. Hegaa giishin paraykka asay uttiyo gaare xallaa goochchees gaanawu danndayettenna.

Gaasoykka paray issi issi heeran haree goochchiyo gaariyakka goochchanawunne ubba hariyassi gooshettenabaakka goochchidi haggaazaa immanawu danndayees. Hagee wontta qommon issi miishshay issibaa xalaalawu haggaazaa immees giidi kuuyiyogee bala qofa giyogaara gayttiyaba. Hegawu gaasoy issibay wodeenne hanotay bessiyo ginan haggaazaa immeesippe attin asay kuuyido oge xalaalaana gidenna giyogaa.

Hageeti leemisodan denddidosonappe attin haratikka walahan oottiyabati de'osona. Issi issi biittan asay gaariya booran woykko macca miizzan gooshissiyo sohoykka de'ees. Miizzaykka kase meezeetido hanotay de'ikko waaxiyorin aybanne yaa haa geennan sitti giidi koyyido sohuwa gakkanaashin gattanawu danddayees. Hara heeran qassi baquluwan, maggaayiyan, maaxaanaaninne gaameelankka gooshissanawu danddayettees. Hegaani awugee awu biittan hegaa mala haggaazaa immii giya oyshawu zaaroy dummatees.

Ha oyshaa zaaroy keehippe qanttaara biittatu wogay eti immiyo haggaazaa kalettees giyogee aybanne deexxenna qoncce miishsha. Issi biittaa wogaadan baquluwa gooshissikko hara biittaa wogay qassi miizzan gooshissees. Issi biittan miizzay gaariya goochchiyogee pokkobadan xeelettikko hara biittan keehippe meezetidaba gidees. Xaaxi waaxiyo wode biittatu giddon de'iya wogaa hanotaynne asaa meeze goochchiya mehetu qommuwa kuuyees.



Shemppuwa 4: Shemppoy De'iyo Toganne caana Meheta

Haray qassi mehetu xallan meeze oosettiya qaattan daro leemisoti de'oosona. Leemisuwassi paray meeze toga mehe gididi asaa tookkidi sohuwappe sohuwa gattidi koyyido kiitaa poliyaba. Paray toggin poliyo oosoti annaaciya, shankkaanne, yehuwa gidanawu danddayees. Paray hara meeze toga mehetuppe wolqqan keehippe daro gidiyogee erettees. Hegaassi harabaa wolqqay likettiyoykka paraa wolqqay mahadan haggaaziyogaana.

Leemisuwassi kattaa gaacciya baabiriya 27 paraa wolqqa awaa geettees. Motoriyawukka hegaa mala paraa wolqqa maha go'etteettes. Paray alleeqo gidiyo gishshawu toggiya uri suure maayuwanne kooraawottidi go'ettees. Paraanhaarida uray ambbaa heeran so kaamee de'iyo uraappe guuxxenna.

Paray hegaa mala alleeqodan asaa tookkidi sohuwappe sohuwa gattiyo, shankkatiyo, annaacettiyonne piriixiyo oosuwa baree gujjiiddi biyo wode issi heeran essiigees. Hegaa giyogee baree ceeggiichchikko togawu haggaa ziyyoga aggidi caanaakkonne goochchiyobaakko aadhdhees. Paray he wodiyan ooso xalla gidennan sunttaakka laammidi maaxaanaa geetettiyyoga doommees. Qanttaara ceggida paray sunttay laamettin maaxaanaa geetettees. Ceeggida paraa woykko maxaanaa asay caaniyobawu go'ettidi keehippe darobaa woykko gitabaa issi sohuwaa gattanawu danndayees.

Maaxanay caanin tookkidi hemettiyogaa xalla
gidennan gaariyakka goochchanawu danddayees.
Ubba hegaappe aadhdhidi issi issi heeran waaxettidi
goshshaakka goyyiyogan haggaazees. Paray macca
gidikko daroto yelagatettankka yeluwappenne
caanappe attin togawu ayba maaduwanne immenna.
Macca paray maggaayiya geetettidi xeesettees.
Maggaayee koyyidoogaa keena miishshaa tookkidi
qaaxxnawu danddayees. Gidikkonne macca paray
goochchiyoban haggaazaa immiiddi beetti erenna.

Macca paray yelidi hemetawunne caanawu aatti
immiyoy bari mala para xalla gidenna. Baquloykka
paraappe yelettiyogee mereta seeraappe perzzidaba
gididi beniisappe keehippe maalaaliiddi gam"idaba.
Hegeekka waanidi hanii giya oyshay bosan bosan
denddanawu danddayees. Gidoppe attin zaaroy
ha'ikka mereta wogaara gattidi qoppiyo wode
maalaaliyaba. Saalawu hoolashishin macca
pariya naa"u kochcha attumaagaara gayttawusu.

Hegeetikka hariyanne paraa kochcha geetettidi erettoosona. Macca pariya woykko maggaayiya hariyara gaytikko baquluwa yelada paraara gaytikko qassi paraa yelawusu giyogaa.

Hegaassi asay honaa giidi baquluwa koyyiyo hanotay de'ikko maggaayiyo hariyara gattees. Paraan koyyiyaaba gidikko qassi maggaayiya hariyara gayttenaadan naagidi paraara gattees. Hagee saynise eran gidennan dola mereta eran kuuyettidi polettiyaba. Ha'i wode saynise oosuwan issuwa sotuwa haraa sotuwara gattidi walahettida maraa medhdhiyogaappe paraa yeluwabay haakkidi kasekka de'iyaba.

Ha qommon qonccida toganne caana mehee woykko paray meeze toganne caana miishshatuppe issuwa gidiyogee qoncce. Haray qassi maggaayiya yeliyo baquluwakka togawunne caanawu go'ettanawu danddayettees.

Dola mereta togawunne caanawu go'ettiyobatuppe baquloy asanne asa gidennabaakka sohuwappe sohuwa gattiyogan metoy baynnan haggaazees. Baluqoy paragaadan togettiiddi ceeggidi wolqqi ixxiyo wode caanawu simmenna. Caanay koshshikko cookka caanettees, kooraa wottikko qassi togettidi sohuwappe sohuwa qaaxxes. Hegaa giyogee baqulo sheeshshay ceeggidikka toga xalaalawu haggaazanawu danndayees giyogaa.

Wotaratettankka togi koshshana xayikko caana xalaalawu haggaaziiddi ceeggi aggees. Baquloy naa"u kaniyappe paraappenne hariyappe beettiyaba gidiyo gishshawu wolqqan paraa gakkana xayikkonne shayaa minotan naa"aappekka aadhdhidi togan woykko caanan haggaazees. Baquloy bari aayee maggaayeppe gidin bari aawaa hariyappe ekkiis giyo eeshshi darenna gaanawu danndayettees. Gaasoykka attumay maccaaro ziittishin macca baquloy qassi kunttada yelishin be'iday baawa.



Shemppuwa 5: Kuushshaa

Xaaxi waixin meeze toganne caana miishshati saynise eray walahettibeennabata. Asay metuwa birshshanawu bantta heeraappe go'ettiyo mehenne mehiyan gooshettiyaba gidiyogee qoncciis. Hegeetikka zokkuwan tookkidi haggaaziyanne guyyeera goochchiyabata. Zokkuwan ba'iyabati guyyeera goochchiyobi qashettennan toggin woykko zokkuwan caanin koyyido sohuwa gattiyageeta. Goochchiyogee qassi goomaara de'iya gaariyan caanin goochchidi koyettida sohuwa gattiyogaa.

Gaameelaykka zokkuwan qoodi zawi baynnabaa ba'idi koyyido sohuwa gattiyo haggaazaa immees. Hegaa gishshawu gaameelay daro heeraaninne daro asan bazzuwa markkabiya geetettidi erettees. Bazzuwa markkabiya geetettido gaasoykka gaameelay haattaa qaxuway de'iyo mela bazzuwan issitoo uyido haattaara heezzu oyddu saamintta gakkanaashin koyyido haggaazaa immiyogaa. Gaameelay miyobi woykko mittaa bonccoy de'ikko boncco xallaa miiddi deren de'iya caanaa tookki ekkidi koyyido keena haahuwa hemettanawu danddayees.

Ha qommoora qonccida meeze toganne caana mehetinne miishshati saynise eray diccin merettida zammaana toganne caana miishshati yaanaashin kumetta haggaazaa immiiddi takkidosona. Hegaa giyogee hageeti ha'i zammaana toganne caana miishshati yiini shempidosona haggaazokkona giyogaa gidenna. Ha wodiyankka dumma dumma sohotun dumma dumma ogiyan miishshata sohuwappe sohuwa qaattiyo hagaazaa immiiddi de'oosona.

Nabbabi simmidi zaariyo oyshata

Nabbabuwaninne ne buzo akeekan amppada kaalliya oyshata zaara.

1. Toganne caana miishshata giyogeeti aybee aybee?
2. Meeze toganne caana miishshata giyogeeti awugeetee?
3. Shemppoy de'iyo toganne caana miishshati aybee aybee?
4. Meeze toganne caana miishshati baynnaakkoo beni asay waananddeeshsha?
5. Nabbabuwa giddon “perzzidaba” giya qaalawu gelo birshshettay aybee?

